



Sujet 2013:

Chaufruusch in Lieschtel !!!

Ychaufsboom dank de nöie Ychaufszentre. Do niemerts mee z Basel goot goo schoppe, hälfe d Basler Stadtreiniger by Öis do z Lieschtel uus.

Lädele duesch jetz nümme, nei jetz duet me schoppe in öise nöie „Powercenter“. D Manor und spööter no der Coop liifere bald fascht alles fürs täglich Brot. Aber numme fascht alles, oder ebe numme zum Teil, das finde öisi Stedtli-Chrämer geil!

Jetz heisst für eusi Chrämer im Stedtli Yyfallsrychtum lo walte, es darf nid alles blybe bym Alte. Mit guete Idee und geziiltem Aagebot si die Schlaue derby und chönne au näbe de Grosse existiere, aber ebe es mues scho e chly öbbis bassiere!

Die nöie Center füere zumene richtige Ychaufsrusch und stundelang wird umeflaniert und do und dört Sache uus- und aaprobiirt. Wenn me denn au emol uffem ehemoige Ziegelhofareal im Coop cha go schoppe, chönntis sy, dass eim blötzlich der Geischt vom Jakob Meyer duet foppe!

D Büchelistrooss, der nöii Manorplatz und au alli Gasse und Stroosse im Stedtli si jetz no mee d Visitecharte vom nöie Stadtbild, das heisst me muss se hüffig butze und sauber halte, uf kei Fall darf me der Dräck wie früener e paar Dag bhalte.

Aber halt, jetz wärde jo denn die nöie Unterflursammelstelle im Stedtli in Betriib gnoo, denn gseet me keini Abfallsäck mee im Stedtli ummestoo. Das Abfallsystem isch sauber, hygienisch, fascht grüschlos und es sell nümme stinke. Ab mit em Sack undere Bode, mit der Abfall-Chipcharte goot das schynts blitzschnäll und es isch nid glooge, Lieschtel isch jetz sauber im Stedtli am Bode.

Wenn du aber emol kei Zyt oder Luscht hesch zum go ychaufe oder schoppe, kei Problem. Es Telefon an d Velostation und sogar der Milchmaa chunnt jetz mit em Velo und bringt alles, was du bruuchsch schnäll und bequem bis an dyni Huustüre.

Chömmer jetz nomol zrugg ins Stedtli mit syne Um- und Nöiboute. Vo der Manor chasch jo dur d Stadtmuure duure in d Kanonegass und wyter dure Nöibou vom ehemalige Küffi bis in d Rothuusstrooss. Das heisst du bisch blitzartig im Stedtli und chansch äntwäder e chly ummeschnuure oder vo Lädeli zu Lädeli suurre, bis in der Manor dyni Parkzyt isch duure.

Und do none Tip an alli wo gärn wärde go lädele, schoppe oder e Stedtlibummel mache. Chömmed am 16./17. März 2013 uf Lieschtel. Es git e Erläbnisbummel, s nöie Bücheli-Center mit der Manor isch eröffnet und mehr als 60 Gschäfte biete bunti Erläbnis a mit „Workshops“ bis zur Rennwagefaart im Simulator. Es git Ychaufsrabatt, Aktione und d Reschterant hei Überraschigsangebot, dodertzue gits Stedtlifüerige und e musikalischs Raameprogramm. Also iir Dame im Ychaufsrusch, ab uf Lieschtel go schoppe!!!

Wie allewyyl isch am Fasnechtszyschdig d Ladäärne-Uusstellig in der Roothuusstrooss vom zwöi Zmidaag bis am nüüni oder no spööter Zoobe!